

Mga Pagpili alang sa Kahangtoran, Bahin 3



Hibaloa ang kamatuoran nga may kalabotan sa inyong pagkakabig. Ang kamatuoran mao nga kinahanglan inyong angkonon ang inyong kaugalingon nga pagkakabig. Walay laing makahimo niini alang kaninyo.

Karon, mahimo bang dapiton ko kamo sa pagkonsiderar og pipila ka pangutana? Gusto ba kamong mobati og kalinaw mahitungod sa mga kabalaka nga kasamtangang naghasol kaninyo? Gusto ba kamong mas makaila ni Jesukristo? Gusto ba kamong makat-on kon sa unsang paagi ang lyang balaanon nga gahom makaayo sa inyong mga samad ug mga kahuyang? Gusto ba

kamong makasinati sa tam-is, makahupay nga gahom sa Pag-ula ni Jesukristo nga naglihok sa inyong kinabuhi?

Ang pagtinguha sa pagtubag niini nga mga pangutana magkinahanglan og paningkamot—dakong paningkamot. Ako mangamuyo kaninyo sa pag-ako sa responsibilidad sa inyong pagpamatuod. Trabahoa kini. Angkona kini. Atimana kini. Amumaha kini aron motubo kini. Palamboa kini gamit ang kamatuoran. Ayaw kini hugawi sa sayop nga mga pilosopiya sa dili matuohon nga mga lalaki ug mga babaye ug dayon matingala nganong nagkahuyang ang inyong pagpamatuod.

Buhata ang inadlaw, sinsero, mapainubsanon nga pag-ampo. Amumaha ang inyong kaugalingon gamit ang mga pulong sa karaan ug sa modernong panahon nga mga propeta. Hangyoa ang Ginoo sa pagtudlo kaninyo kon unsaon nga mas maayong makapaminaw Kaniya. Paggahin og dugang nga panahon diha sa templo ug sa buhat sa family history.

Samtang inyong himoon ang inyong pagpamatuod nga inyong kinatas-an nga prayoridad, bantayi ang mga milagro nga mahitabo sa inyong kinabuhi.

Kon kamo adunay mga pangutana—ug ako naglaom nga kamo aduna—pangita og mga tubag nga inubanan og mainiton nga tinguha nga motuo. Pagkat-on sa tanan nga inyong mahimo mahitungod sa ebanghelyo ug seguroha nga modangop ngadto sa mga tinubdan nga puno sa kamatuoran alang sa giya. Nagpuyo kita sa kapaigoan nga “walay [ma]tago” [Doktrina ug mga Pakigsaad 121:28]. Mao nga, sa paglabay sa panahon, ang Ginoo motubag sa atong tanang pangutana.

Sa pagkakaran, ihumol ang inyong kaugalingon diha sa buhong nga kapanguhaan sa pagpadayag nga dali ra kaayo natong ma-access. Ako mosaad nga ang pagbuhat sa ingon mopalig-on sa inyong pagpamatuod, bisan kon pipila sa inyong mga pangutana wala pa matubag. Ang inyong sinsero nga mga pangutana, nga gipangutana sa hugot nga pagtuo, mosangpot *kanunay* sa mas dako nga hugot nga pagtuo ug dugang nga kahibalo. . . .

Samtang akohon ninyo ang responsibilidad sa inyong pagpamatuod ug mopahinabo niini nga motubo, mahimo kamong mas epektibo nga instrumento diha sa mga kamot sa Ginoo. Kamo “[m]adasig pinaagi sa usa ka maayo nga katuyoan” [Alma 43:45]—ang kawsa ni Jesukristo!

Walay laing nahitabo niini nga yuta nga mas importante kaysa pagpundok sa Israel *alang Kaniya*. Pahibaloa ang inyong Langitnong Amahan nga gusto kamong motabang. Hangyoa Siya nga ibutang kamo sa pagbuhat niining mahimayaon nga kawsa. Ug dayon barog ug katingala sa unsay mahitabo kon tugotan ninyo ang Dios nga mopatigbabaw labaw sa tanan sa inyong kinabuhi.

Akong minahal nga mga higala, gimahal ko kamo. Ako magpasalamat kaninyo. Ako nagtuo kaninyo. Isip ang propeta sa Ginoo, gipanalanginan ko kamo nga masayod sa kamatuoran mahitungod kon kinsa kamo ug sa paghatag og bili mahitungod kon unsa gayod ang inyong mahimayaon nga potensiyal. Panalanginan ko kamo nga akohon ang responsibilidad sa inyong kaugalingon nga pagpamatuod. Ug panalanginan ko kamo nga makabaton sa tinguha ug kalig-on sa pagtuman sa inyong mga pakigsaad.

Kon inyong buhaton, ako mosaad nga kamo makasinati sa espirituhanon nga paglambo, kagawasan gikan sa kahadlok, ug usa ka pagsalig nga dili kaayo ninyo mahunahuna karon. Kamo makabaton sa kalig-on nga magkaanaa og positibo nga impluwensiya nga labaw gayod sa inyong natural nga kapasidad. Ug ako mosaad nga ang inyong kaugmaon mahimong mas makadasig kaysa bisan unsang butang nga inyong kasamtangan nga gituohan. (Russell M. Nelson, “Mga Pagpili alang sa Kahangtoran” [tibuok kalibotan nga debosyonal alang sa mga young adult, Mayo 15, 2022], [broadcasts.ChurchofJesusChrist.org](https://www.churchofjesuschrist.org/broadcasts))